

譽兮歿而不朽垂名著兮余家漢碑常患其銘多闕  
滅而斯銘偶完故錄之

### 伯著碑

右伯著碑者在今宿州出於近歲蓋宮部春夫開汴  
渠於泥沙中掘得之其文字古恠而磨滅無首尾了  
不可讀伯著不知爲何人其僅可見者云激海君玄  
孫季景長子也其事迹不可考文辭莫曉而字畫不  
工徒以其古恠錄之此誠好古之弊也

治平元年七月三十日

### 袁良碑

右袁良碑云君諱良字卿卿上一字滅陳國扶樂人  
也厥先舜苗世爲封君周興虞闕父自此而滅又云  
滿爲陳侯至玄孫濤塗以字立姓曰袁自此又滅又  
云當秦之亂隱居河洛高祖破項寔從其策天下旣  
定還宅扶樂蓋不知爲何人也又云孝武征和三年  
魯孫斬賊先勇拜黃門郎曾孫滅其名賊下亦滅一  
字又曰封關內侯食遺鄉六百戶薨子經嗣經薨子  
山嗣傳國三世至王莽而絕君即山之曾孫也舉孝  
廉郎中謁者將作大匠丞相令廣陵太守討江賊張



路等威震徐方謝病歸家孝順初初下數字滅又云  
府舉君拜議郎符節令其後又云永建六年二月卒  
其碑首題云漢故國三老袁君碑而碑文有使者持  
節安車又有几杖之尊袒割之養君實饗之之語以  
此知良嘗爲三老矣其餘磨滅雖時時可讀而不能  
次第 又云帝御九龍殿引對飲宴九龍殿名惟見  
於此治平元年五月二十九日夏至假書

王稚子闕

右漢人闕銘二其一曰永樂少府賈君闕其一曰雒  
陽令王君闕二者皆不知爲何人按漢書相帝母  
宗屢皇后居永樂宮和平元年詔置太僕少府如長  
樂故事又按顏師古注地理志曰魚豢云漢火行忌  
水故云洛水加佳師古謂光武以後始改爲雒然則  
二人者皆後漢時人也又按漢官儀長樂少府以宦  
者爲之則賈君蓋亦宦者也治平元年九月十五日  
書

堯祠碑

右堯祠碑在濟陰碑云帝堯者蓋晉世之聖王也又



曰聖漢龍興纂堯之緒祠以上犧至於王莽絕漢之業而壇場夷替屏攝無位大抵文字磨滅字雖可見而不復成文其後有二李樹連理生於堯祠太守河南張寵到官始初出錢二千敬致禮祠其餘不能讀也碑後有年月蓋熹平四年建也治平元年五月晦日書

### 碑陰題名

右碑陰題名不知爲何人碑余家集錄古文既多或失其所得之自然漢碑存於今者惟華嶽與孔子廟

最多其陰往往列修廟人姓名并記其所出錢數過三百至五百今斯碑所題文字闕滅而中間有各五百四字則似是修廟人所記其人可見者有濟陰定陶蔡顯于盛山陽金鄉張諺孝德河南宛陵趙堂世萇南陽南鄉鄧升升遠濟陰成武周鳳季節而其餘人姓名邑里多不完又時時有故更字不知爲何人祠廟第以漢隸難得錄之爾治平元年閏五月八日書

### 張公廟碑



右張公廟碑在黎陽而碑無題首又其文字殘滅不可考究莫知爲何碑第時時得其字之可識而僅成文者曰惟和平元年正月丙寅和平桓帝年號以此知爲漢碑也又曰豐碑廟堂之前又曰於穆張公則又知爲張公廟碑矣又云國無災寇屢復豐年作歌九章頌公德芳其辭有云公與守相駕蕙蜚往來倏忽遠熹娛祐此兆民寧厥居其餘字畫尚完者甚多但不成文爾治平元年閏五月九日書是日奏事拱退召赴延和閣謝契舟禮物遂歸休

### 碑陰題名

右碑陰題名二皆不知爲何碑陰其人各記所出錢數似是漢時修廟人題名余家集錄華嶽及孔子廟碑多如此此亦疑是二廟中碑前碑殘滅尤甚第時有門生濟南東郡等字而姓名無復完者後碑則有議曹功曹騎吏有蓮勺左鄉有秩池陽左鄉有秩池陽集永有秩皆不知是何名號又有夏陽候長祿祔候長則是縣吏之名其隸字不甚精又無事實可考姑錄其名號以俟知者爾治平元年閏五月九日書



西嶽華山廟碑

右西嶽華山廟碑文字尚完可讀其述自漢以來高祖初興改秦滌祀太宗承循各詔有司其山川在諸侯者以時祠之孝武皇帝修封禪之禮巡省五嶽立宮其下宮曰集靈宮殿曰存僊殿門曰望僊門中宗之世使者持節歲一禱而三祠後不承前至於亡新寢用丘虛建武之元事舉其中禮從其省但使二千石歲時往祠自是以來自餘年所立碑石文字廢壞延熹四年弘農太守袁逢修廢起頓易碑飾闕

京兆尹孫府君到欽若嘉業遵而成之孫府君諱璆其大略如此所謂集靈宮者他書皆不見惟見此碑則全之集錄不爲無益矣治平元年閏月十六日書

孔德讓碣

右孔德讓碑蓋其名已磨滅但云字德讓者宣尼公二十世孫都尉君之子也仕歷郡諸曹史年二十求興二年七月遭疾不祿碑在今兗州孔子墓林中求興孝相帝年號也其人早卒無事蹟可考余集錄所藏孔林中碑最後得此遂無遺者蓋以其文字簡少



無事實故世人遺而不取獨予家有之也治平元年閏五月二十日書

孔宙碑陰題名

右孔宙碑陰題名漢世公卿多自教授聚徒常數百人其親授業者爲弟子轉相傳授者爲門生今宙碑殘闕其姓名邑里僅可見者纔六十二人其稱弟子者十人門生者四十二人故吏者八人故民者一人宙孔子十九世孫爲太山都尉自有錄治平元年閏五月二十一日書

楊震碑陰題名

右楊震碑陰題名者一百九十人其餘磨滅不全者又十餘人余家所錄漢碑陰題名頗多或稱故吏門生弟子或稱從事曹掾之類其人皆著州縣邑里名字甚詳獨此碑所書簡略直云河間賈伯錡博陵劉顯祖之類凡百九十人者皆然疑其所書皆是字爾蓋後漢時人見於史傳者未嘗有名兩字者也漢隸世所難得幸而在者多殘滅不完獨此碑刻畫完具而隸法尤精妙甚可喜也治平元年中伏日書



唐君碑

右唐君碑其名已磨滅其字正南云潁川鄆人也其先出自慶都感赤龍生堯王有天下苗胄枝分相土視居因氏唐焉君父孝廉郎中早卒君繼厥緒耽道好古敦書味詩守舞陽永潁陽令察能治劇遷豫章其後遂復磨滅文字班班可見而不能得其次序其後又云授君昌陽令吏民慕戀牽君車輪不得行君臣流涕道路琅玕是故從事郡掾刊石樹頌歌君之美據此蓋縣令去思碑爾其後又云光和六年二月壬午朔二十五日丙午則知唐君爲後漢時人矣治平元年閏五月二十八日書

熊君碑

右熊君碑云君諱喬字舉舉上滅一字其官闕不可詳考其僅可知者劉表時爲緩民校尉後遷騎都尉建安二十一年卒享年七十有一其辭有云治歐羊尚書其字非訛闕而以陽爲羊蓋古文字少故須假借至漢字已備而猶假用何哉後云太歲在申申上滅一字以曆推之當是丙申又云碑師春陵福造福



上滅一字當是其姓其書顯字皆爲顯按許慎說文顯從晷聲而轉爲累其失遠矣莫曉其義也熙寧二年十月晦日山齋記

### 敬仲碑

右敬仲碑者其姓名字皆不可見惟其初有敬仲二字尚可識故以寓其名爾蓋疑其人姓田氏也大抵文字磨滅比其他漢碑尤甚字可識者頗多第不成文爾雅云州郡課最臨登大郡又云居喪致哀又云司隸從事治書侍御史又云光和四年閏月庚申此數句粗可讀爾其餘字畫僅完者以漢隸今爲難得錄之爾治平元年閏五月二十九日書

### 衡方碑

右衡方碑云府君諱方字興祖其先伊尹在殷號稱阿衡因而氏焉又曰州舉孝廉除郎中即丘侯相膠東令州舉尤異遷會稽東部都尉又拜議郎北平太守遷潁川太守又曰拜步兵校尉年六十有三建寧元年二月五日癸丑卒於是海內門生故吏采嘉石樹靈碑鐫茂伐秘將來此其始終之大略其餘歷歷



可見而時亦磨滅以其文多不備錄也治平元年六月三日書

### 俞鄉侯季子碑

右俞鄉侯季子碑云君諱熊字孟孟下關一字廣陵海西人也厥祖天皇大帝垂精接感篤生聖明子孫享之分源而流枝葉扶疎出王別胤受爵列土君光武皇帝之玄廣陵王之孫俞鄉侯之季子也由是而後文字闕滅其稍稍可讀者時得其一二云六籍五典如源如泉既練州郡卷舒委隨化流南城政猶北辰三祀有成來臻我邦仁恩如冬日威猛烈炎夏更民愛若慈父畏如神明其後又云采摭謠言作詩三章據碑文無卒葬年月而其辭若此似是德政碑按後漢書光武皇帝子曰廣陵思王荆荆子元壽等四人皆封鄉侯而不載其名俞鄉侯者不知爲思王荆之第幾子也治平元年六月五日書

### 堯祠祈雨碑

右堯祠祈雨碑首尾殘滅其僅可識者有云股肱賢良廣祈多福虔虔夙夜又云常以甲子曰詔大常陳



上古之禮舜先王之樂又云延熹十年仲春二月陽  
氣侵陰又云享祀羣神仰瞻雲漢又云嘉樹優沾利  
茂萬物又云孟府君知堯精靈與天通神修治大殿  
以此知爲祈雨於堯祠也堯祠在漢濟陰郡孟府君  
者當是濟陰郡太守也其餘隸字完者頗多亦徃徃  
成句但斷絕不可次序爾治平元年六月六日書

### 景君碑

右景君碑尤磨滅惟謁者任城景君數字尚完其餘  
不可見者皆不能成文故其平世壽考功行卒葬

考也蓋漢隸今尤難得其磨滅之餘可惜爾  
寧二年十月晦日山齋書

### 景君石郭銘附

右景君石郭銘余旣得前景君碑又得此銘皆在任  
城不知一景君乎將任城景氏之族多耶文字磨滅  
不可考故附于此熙寧三年正月朔旦山齋記

### 郝閣頌

右析里橋郝閣頌建寧五年立云維斯析里處漢之  
右溪源漂疾橫柱于道涉秋霖漉積滯固旅休謁往



還常失日畧行理咨嗟郡縣所苦斯溪旣然邠閣元  
甚臨深長淵三百餘丈接木相連號爲萬柱遭遇隄  
納人物俱隋沉沒洪淵酷烈爲禍於是太守河陽李  
君諱會字伯都以建寧三年二月辛巳到官思惟惠  
利有以綏濟聞此爲難其日久矣乃俾府掾仇審改  
解危殆即便求隱析里大橋於爾乃造又驛散關之  
嶮潔徒朝陽之平慘滅西高閣就安寧之石道禹導  
江河以靖四海經紀厥績艾康萬里乃作頌曰頌後  
又有詩皆磨滅不完其云遭遇隄納又云驛散關

徒朝陽之平慘刻畫適完非其訛謬而莫詳其  
義疑當時人語與今異又疑漢人用字簡略假借不  
同尔故錄之以俟博識君子治平元年六月十日書

### 曹鳳碑

右曹鳳碑云字伯蕭梁相之元子也漢安二年舉孝  
廉拜郎中除陳國新平長又云試守故障茲其文班  
班可見而卒葬年壽皆不載其後悉爲五言韻語其  
略曰不悟奄忽終藏形而匿景耕夫釋耒耜桑女投  
鉤莒道阻而且長坐起淚如雨其文旣非工故不悉



錄熙寧二年十一月十六日山齋書

魏受禪壇碑

右魏受禪碑世傳爲梁鵠書而顏真卿又以爲鍾繇書真知孰是按漢獻帝紀延康元年十月乙卯皇帝遜位魏王稱天子又按魏志是歲十一月葬士卒死亡者猶稱令是月丙午漢帝使張愔奉璽綬庚午王升壇受禪又是月癸酉奉漢帝爲山陽公而此碑云十月辛未受禪于漢三家之說皆不同今據裴松之注魏志備列漢魏禪代詔冊書令群臣奏議甚詳蓋

漢實以十月乙卯策詔魏王使張愔奉璽綬而魏王辭讓往反三四而後受也又據侍中劉廙奏問太史令許芝今月十七日巳未可治壇場又據尚書令栢階等奏云輒下太史令擇元辰今月二十九日可登壇受命蓋自十七日巳未至二十九日正得辛未以此推之漢魏二紀皆謬而獨此碑爲是也漢紀乙卯遜位者書其初命而略其辭讓往反遂失其實爾魏志十一月癸卯猶稱令者當是十月衍一字尔丙午張愔奉璽綬者辭讓往反容有之也惟庚午升壇最



爲謬尔癸卯去癸酉三十一日不得同爲十一月此尤謬也禪代大事也而二紀所書如此則史官之失以惑後世者可勝道哉嘉祐八年九月十七日書

### 魏公卿上尊號表

右魏公卿上尊號表唐賢多傳爲梁鵠書今人或謂非鵠也乃鍾繇書尔未知孰是也嗚呼漢魏之事讀其書者可爲之流涕也其巨碑滯字其意惟恐傳之不遠也豈以後世爲可欺歟不然不知耻者無所不爲乎

右歐陽公集古錄二卷公名脩字永叔廬陵人平生嗜古有歷代石刻一千卷軸而藏之撮其大要爲之說既刻而傳於世矣嘉祐治平年公在政府時又各書其卷尾文或小異蓋竄定有先後也凡說漢隸者今錄之張平子碑南陽秦君額皆篆也左右生題名非文翁學生也故去之其間姓名官稱歲月文辭考證之誤者視隸釋則可見也千卷之藏其傳不一再世而靡有孑遺矣聚之難而散之易如此惜哉



隸釋卷第二十三

歐陽棐集古錄目

集古錄既成之八年家君命棐曰吾集錄前世埋沒  
缺落之文獨取世人無用之物而藏之者豈徒出於  
嗜好之僻而以爲耳目之玩哉其爲所得亦已多矣  
故嘗序其說而刻之又跋於諸卷之尾者二百九十  
六篇序所謂可與史傳正其闕謬者已粗備矣若撮  
其大要別爲目錄則吾未暇然不可以闕而不備也  
棐退而悉發千卷之藏而考之曰嗚呼可謂詳矣蓋  
自文武以來迄于五代盛衰得失賢臣義士姦雄賊



亂之事可以動人耳目者至於釋氏道家之言莫不  
皆有然分散零落數千百年而後聚於此則亦可謂  
難矣其聚之既難則其久也又將遂散而無傳宜公  
之惜乎此也於是各取其書撰之人事迹之始終所  
立之時世而著之爲一十卷以附於跋尾之後夫此  
千卷之書者刻之金石託之山崖未嘗不爲無窮之  
計也然必待集錄而後著者豈非以其繁而難於盡  
傳哉故著其大略而不道其詳者公之志也熙寧二  
年二月記

沛相楊君碑

右不著書撰人名氏楊君震之後也孝順帝時以祿  
史召拜郎中累遷沛相建寧中卒碑爲隸字首尾不  
完失其名字矣碑在閩鄉震墓側

楊君碑陰題名

右不著書人名氏碑首尾不完今可見者四十餘人  
各有所出錢數楊氏數世皆葬閩鄉此碑有稱後公  
門生者有稱沛君門生者不知何人碑陰也後公義  
不可知沛君所謂沛相者也碑在陝府閩鄉



郭先生碑

右隸書不著書撰人名氏書字甚古蓋漢碑也先生名輔字甫成荊州人碑在襄州穀城縣

魏受禪壇記

右隸書不著書撰人名氏世傳以爲鍾繇書或以爲梁鵠書魏文帝黃初元年爲壇於繁昌以受漢禪碑不著所立年月在許州魏文帝廟中

魏公卿上尊號表

右不著書撰人名氏字與受禪壇記同漢旣禪位文帝未受魏相國安樂鄉侯華歆等上表勸進碑在許

州

楊震碑

右隸書不著書撰人名氏其前不完碑首題曰漢太尉楊公神道碑銘震安帝時位至太尉碑在陝府閩鄉縣

繁陽令楊君碑銘

右漢隸不著書撰人名氏殘缺不完不見其名字其可見者曰富波君之小子據楊震碑考之富波侯相



名牧震之子也碑在陝府閩鄉

高陽令楊君碑

右漢隸不著書撰人名氏首尾不完不見名字據碑  
嘗為高陽令最後為善上一字闕侯相而碑額但曰高陽

令楊君碑據楊震碑高陽令名著震孫也碑在陝府  
閩鄉

文翁石柱記

右漢隸不著書撰人名氏初文翁為蜀郡守始立學  
校至安帝末初中以火災被焚惟廟門兩石闕猶存

獻帝時太守高朕重修立之又於其東別築周公禮  
殿碑以初平五年立在益州

魏大饗碑

右隸書不著書撰人名氏亳州圖經以為梁鵠書魏  
文帝初即王位將伐吳南行至譙饗軍士耆老于故  
宅此碑其元年上兩字缺不可見當為延康元年也  
在亳州魏帝廟中

魏魯孔子廟碑

右不著書撰人名氏字薦隸書魏文帝黃初二年封



議郎孔羨爲宗聖侯奉孔子祀詔魯立廟置吏卒守衛魯人立此頌碑在兗州

樊常侍碑

右漢隸不著書撰人名氏常侍名安字子佑南陽湖陽入官至中常侍追贈騎都尉此碑并追贈制書同刻以延熹三年立在唐州湖陽縣

玄儒婁先生碑

右隸書不著書撰人名氏先生名壽字元孝南陽人隱居不仕以教授爲業碑延熹中立在光化軍乾德

縣書墓之側

老子銘

右漢陳相邊韶撰字爲隸書不著名氏世以爲蔡邕書據碑延熹八年八月桓帝夢見老子尊而祀之韶時典其禮因而爲銘碑在亳州衛真縣太清宮

曹騰碑

右漢隸不著書撰人名氏騰桓帝時官至中常侍長樂大僕封費亭侯追加兼諫議印綬碑無所立年月在亳州



桂陽周府君碑

右漢隸不著書撰人名氏韶州圖經云郭蒼撰初桂陽有瀧水人患其險太守下邳周憬字君光顏山鑿石以通之延熹三年故吏區祉刻石以紀功并祉等故吏題名者二十二人在韶州樂昌縣昌樂瀧上周君廟中

桐柏廟碑

右漢隸不著書撰人名氏南陽太守盧奴碑缺不君見姓延熹六年重修桐柏廟作此頌桐柏淮源也碑在鄧州

修西嶽廟復民賦頌

右隸書不著書人名氏漢弘農太守樊毅上尚書表也毅使從事荀班華陰令先謹繕治嶽廟并復華下十里民田租口筭以其事表上光和二年也碑久埋沒唐興元元年華陰令盧倣求得而為之記八分書於碑末在華州

楊公碑陰題名

右漢隸無名氏題名可見者十五人皆稱故吏在閩



鄉楊氏墓側不知何人碑陰也并漢殘碑題名附首  
尾殘缺存者四十餘人又有衙令修廟題名最完可  
見者曰朔方臨戎孫羨太守仇君察孝廉遷衙令到  
官立祠刊石其後列時人姓名所出錢數然亦不言  
所立爲何祠也碑延熹五年立

### 朱龜碑

右不著書撰人名氏字爲隸書龜字伯靈廣陵人官  
至幽州刺史碑以中平中立碑缺不在亳州  
見年數

### 劉寬碑

右漢隸不著書撰人名氏寬字文饒弘農華陰人靈  
帝時官至太尉封還鄉侯謚曰昭烈此碑故吏李謙  
等所立在洛陽

### 劉寬碑

右漢隸不著書撰人名氏寬門生殷苞等立不知所  
立年月在洛陽

### 孫叔敖碑

右漢隸不著書撰人名氏叔敖事迹著於史傳然皆  
謂之叔敖而已獨此碑言其名饒叔敖乃字也其他



事迹與史傳同延熹三年期思令光碑亡其姓為之立廟及此碑在光州

### 殺阮神君碑

右漢隸不著書撰人名氏中條山有石隄樹谷常湧溢為患故立殺阮泄其水注之於渭自前漢時立廟以祠之其後阮稍堙塞廟亦毀廢後漢鄭縣令裴暉字君光復浚阮立廟碑以光和四年立并縣丞夏襲等題名者六十三人在華州鄭縣

### 樊毅修華嶽廟碑

書不著書撰人名氏據碑漢光和元年弘農太守河南樊毅字仲德初至郡親祠西嶽以其齋室逼窄使縣令胸忍先謹繕治之明年正月己卯而就立此碑在華州

### 祝睦碑

右漢隸不著書撰人名氏睦字元德濟陰己氏人相帝時官至山陽太守碑以延熹七年立在南兖虞城縣

### 范式碑



右隸書不著書撰人名氏式字巨卿山陽金鄉人後漢時官至廬江太守獨行之士也此碑文字斷缺其字及鄉里皆不可見魏青龍三年縣長薛名為之立廟建碑在金鄉

### 祝睦後碑

右漢隸不著書撰人名氏睦故吏王堂等所立其所叙述與前碑同在南京虞城縣

### 殘碑

右隸書今殘缺之餘所存者數十字而有其名字曰高字幼德其他皆不可知也

### 修孔子廟器表

右隸書不著書撰人名氏據碑孔子甥顏氏居魯親里妃并官氏居安樂里魯相河南京人韓勅字叔節復其里中繇役以尊孔子孔子廟所藏舊車見毀於秦項之際京修立宅廟造桓瑟鼓之屬更作二輿時桓帝末壽二年也碑在交州

### 泰山都尉孔君碑

右隸書不著書撰人名氏孔君名宙字季將孔子十



九世孫後漢相帝時爲泰山都尉以疾致仕碑以延熹七年立在兖州

吳雄修孔子廟碑

右隸書不著書人名氏其奏曰司徒雄司空戒言魯前相瑛言孔子廟褻成侯四時祀已即去有禮器無常人掌領乞置百石卒史出王家錢給饗禮元嘉三年奏制曰可司徒司空下魯相承書從事選年四十年通經藝者求興元年相平等言司徒司空府除文學掾魯孔鮒如牒并爲贊刻於

唯河南人字季育

趙戒成都人字意伯瑛姓乙字少卿平原高唐人碑在兖州

張表碑

右漢隸不著書撰人名氏表字元異嘗爲冀州從事後去官不仕而終碑以建寧中立在冀州

郭中候碑

右隸書不著書撰人名氏中候名已磨滅不可見而字有其下一字曰奇河內汲人仕至北軍中候碑以建寧五年立在河陽



司隸從事郭究碑

右漢隸不著書撰人名氏究字長碑缺汲人也官至司

隸從事碑以中平元年立在河陽

田君碑

右漢隸無書撰人名氏田君名字皆缺亡不可見東平陽人也延熹中太山琅邪盜起以選為費令碑以永康中立在沂州

堯母碑

右隸書不著書撰人名氏堯母慶都葬於成陽立黃

屋其上謂之靈臺歷代常奉祠之至王莽而絕

故廷尉碑缺請於朝後立其廟及濟陰太守審晃修

營之以建寧五年立此碑在曹州濟陰

魯相晨孔子廟碑

右建寧二年魯相晨長史謙表言臣到官謁孔子宅而無公出酒脯之祠輒依杜稷出王家穀春秋行禮以事上尚書并有銘辭皆隸書在兖州

楊君碑陰題名

右隸書凡故吏故民處士等百有餘人在闕鄉楊氏



墓側碑陰

無極山神廟碑

右隸書光和四年太常耽丞敏表上尚書言中山男子高遷等爲無極山索法食乞少府給珪璧制曰可後有銘辭在定州

劉曜碑并陰

右隸書不著書撰人名氏曜字季尼東平無鹽人仕至光祿勳碑缺不見其卒葬年月碑陰有門生故吏題名及所出錢數在鄆州

石經遺字

右古文篆隸三體凡八百二十九字後漢熹平中校定五經使蔡邕以三體書今其石亡失皆盡皇祐中有蘇望者得摸本左傳於故相王文康家取其完者而刻之莫辨其真僞也在洛陽蘇氏家

小黃門譙君碑

右隸書不著書撰人名氏君名敏字漢達碑以中平四年立

太尉劉公碑陰



右隸書故相國別部司馬王曜等數百人皆有所出  
錢數劉寬故吏共爲寬立碑因記於碑陰唐咸亨元  
年寬十五世孫湖城公爽重立此碑又爲記刻於後  
不著書人名氏又有寬子松碑陰題名漫滅不見者  
今過半矣皆在洛陽

### 武榮碑

右漢隸不著書撰人名氏榮字含和相帝末官至執  
金吾丞碑不書其鄉里及卒葬年月

### 郎中鄭固碑

右漢隸無書撰人名氏固字伯堅延熹中仕至郎中

### 武班碑

右不著撰人名氏嚴祺字伯魯隸書君名班字宣  
字敦煌人碑以建和元年立今其文字磨滅姓名鄉  
里粗得其髣髴而官爵事迹皆不可復知矣

### 魯峻碑

右隸書不著書撰人名氏峻字仲嚴高平昌邑人官  
至屯騎校尉以病去位門生于商等追謚曰忠惠父  
碑以熹平中立在今濟州



公昉碑

右不著書撰人名氏公昉成固人碑不書其姓名公昉乃字也耆舊相傳云公昉以王莽居攝中及其妻子室屋牛馬皆升天後漢漢中太守郭芝修其廟立此記不知所立年月在興元

藁長蔡君頌

右不著書撰人名氏字為隸書君名堪字子德河內脩武人碑以光和中立在鎮府

郎中王君碑

右隸書不著書撰人名氏碑石剝缺其間可見者曰季輔漢中太守之孫餘不復可讀而其額曰漢郎中王君銘故知其姓氏官闕耳

太尉陳球碑

右隸書不著書撰人名氏球字伯真後漢光和中位至太尉不知所立年月

北海相景君碑

右隸書不著書撰人名氏景君任城人嘗為北海相終於益州太守碑文歷歷可見而不著君之名字蓋



北海故吏諸生之所立也漢安二年立任城

金鄉守長侯君碑

右隸書不著書撰人名氏君名成字伯盛山陽防東人碑以建寧二年立

王元賞碑

右隸書不著書撰人名氏碑以延熹四年立王君嘗爲封丘令辟司空府元賞其字也碑已漫滅元賞之名及其鄉里皆不可見故以其字稱之

元節碑

右隸書不著書撰人名氏君名立字元節出子伊之後其姓氏爵里卒葬之年月皆不可辯然其隸字甚古所以知爲漢碑也

張壽碑

右漢隸不著書撰人名氏壽字仲吾官至竹邑侯相碑以建寧元年立

無名碑

右隸書不著書撰人名氏漢司隸從事之碑以光和四年立文字缺滅亡其姓名鄉里故謂之無名碑



司隸校尉楊君頌

右隸書不著書撰人名氏文爲韻語然其事迹粗可  
考見其所頌者楊君復余谷之路也未平中始詔開  
余谷中間西羌亂道絕不通復由子午谷險阻爲患  
司隸校尉犍爲武陽楊厥孟文請廢子午道復由余  
谷建和二年漢中太守王升稚紀爲之刻石頌德其  
所謂余谷者蓋斜谷也漢人用字多從省文如此耳  
碑在興元

孔君碑

右隸書不著書撰人名氏孔君名缺不可識其字曰  
亢上孔子十九世孫官至河東太守碑以建寧四年  
故吏王沛等立在交州

費府君碑

右隸書不著書撰人名氏君名况字仲慮官至梁相  
碑不載其鄉里及刻石年月在今南京

樊毅碑

右隸書不著書撰人名氏漢光和二年華陰太守樊  
毅修嶽祠記也并唐貞元三年檢校太子庶子董叔



經等十五人題名附在華州

北嶽廟碑

右隸書不著書撰人名氏文字磨滅者多不可悉考其中間有稱光和四年元氏左尉上郡瑋其意若瑋被選舉而立此銘以報神貺在定州

碑陰題名

右隸書殘缺不完其可見者數十人在陝府關鄉溫氏墓側

慎令劉君墓碑

右隸書不著書撰人名氏劉君名氏缺有其字曰伯麟仕至慎令弃官終于家其卒葬之年月缺滅不明而隱隱可見疑為建寧四年也碑在南京下邑縣

周伯著碑

右其字畫如隸書而甚古怪又多磨滅伯著者莫知為何人其時世亦不可考但其文有曰伯著者渤海君玄孫季景長子而其額曰周末嗣某氏某字不襲可識襲興興上又缺一字渤海君玄孫伯著之碑而已然則周亦非伯著之姓也碑在宿州

臺灣國家圖書館 NATIONAL CENTRAL LIBRARY, TAIPEI, R.O.C.



袁良碑

右隸書不著書撰人名氏良字卿卿上二字缺陳國扶樂人歷議郎符節令嘗為三老其額曰國三老袁君碑碑以未建中立在今開封扶溝

王君闕

右漢人闕銘二其一篆書曰漢故永樂少府將作賈君之闕而將作下二字缺不可識其一隸書曰漢故交州刺史雒陽令王君之闕而王君下亦缺二字

堯祠碑

右隸書不著書撰人名氏文字漫滅者多其大略曰漢慕堯之緒祠以上犧王莽僭漢壇場夷替又曰後舊典造立靈廟以一太牢春秋秩祠陳國鄭下字一缺故太守仲又缺一字廣宗長仲選共立壇墀刊碑紀德李木連理生於堯祠太守河南張寵繼擬前緒以錢二千敬致禮祠臨立壇碑時熹平四年也碑在濟陰

碑陰題名

右隸書不知其為何碑之陰無書人名氏刻石年月

張公廟碑



右隸書不著書撰人名氏字多訛缺雖事迹粗可見而不復成文其間有銘辭凡二首漢朝歌長鄭柳以和平元年爲張公立碑于廟又爲監黎陽營謁者李君作歌九章同刻其後有李君等題名亦訛缺不可辯矣在黎陽

碑陰題名

右凡二本皆隸書前本皆稱舊吏門生後本皆諸曹史騎吏及萬年蓮勺等鄉有秩各有所出錢數

西嶽廟碑

右宋著撰人名氏書仇郭香察隸書延熹四年弘農太守袁逢以嶽廟故碑磨滅改立碑作銘會遷爲京兆尹後太守孫瓌成之碑以延熹八年立在華嶽其後有唐人題名

孔德讓碣

右漢隸不著書撰人名氏孔君名缺德讓其字也孔子二十世孫仕至郡諸曹史碑以求興中立在兖州孔氏墓林中

孔宙碑陰